

14. august 2026

UKA 2026/261

Inatsisartut malittarisassaanni § 36 malillugu matumuuna apeqquteqaat aallaavigalugu oqallisissiasamik siunnersuuteqarpunga:

Apeqquteqaat aallaavigalugu oqallisissiasatut siunnersuut, qanoq ililluta nuna tamakkerlugu utoqqaat toqqissimasumik ataqqinartumillu utoqqalinissaat qulakkeersinnaaneripput.

(Inatsisartunut ilaasortaq Margrethe Thårup Andersen, Demokraatit)

Utoqqaat oqaaseqartartuata 2025-imut nalunaarutaata ilungersunartoqarnera takutippaa. Nalunaarummi tikkuartorneqarput naammanngitsumik paaqqinnittoqarlunilu isumassuisoqartoq, inatsisitigut illersugaannginneq, ineqarnikkut ajornartorsiutit aammalu illoqarfiit nunaqarfiillu akornanni assigiinnginnerujussuit. Aammattaarlu taakkartorneqarluni, utoqqaat tunngaviusumik paaqqineqaratillu nakkutigineqanngitsut, qanigisaasut suliaasanik tiguisariaqartarsimaneri, pisortanit akisussaaffigineqartariaqaraluartunit, aammalu utoqqaat saaffiginnissutiminnik ersarissunik akissuteqarfigineqarneq ajorneri¹.

Nalunaarusiaq ilungersunartutut tigussavarput. Ataqqinninnerunngilaq, utoqqaat pisariaqartitaraluaminnik ikiorneqarnissaminik qulakkeerinnissinnaannginnerat. Ataqqinninnerunngilaq, qanigisaasut akisussaaffimmik kisermaassippata, sullissisussat paamaarussinerat pissutaalluni. Ataqqinninnerunngilaq, utoqqaat nunaqarfinni utoqqarnit illoqarfimmiittunit pitsaannginnerusumik ikiorneqariaannaaneri.

Demokraatit isumaqarput, utoqqaat atugaat politikkikkut pingaartinneqarnerusariaqartut. Imaanngittoq utoqqaat sanngiittut nanertuutaasutullu takutinniarneqarmata. Taamaanngilarli. Utoqqaat inuiaqatigiinni pingaaruteqartuupput. Misilittagaqarput, inuunermik ilisimasaqarput, ilaqutariittut oqaluttuassartaqarput nunatsinnullu suleqataallutik, ataqqinninnermik tunisariaqartut. Taamaattumilluuna sapiissuseqarluta oqaluuserinnittariaqartugut, inuiaqatigiit akisussaaffimmik maannamiit pitsaanerusumik iliuseqartariaqarluta.

Utoqqaq aangerlarsimaffimmini ikiortimik, paaqqutarinninnermik, puigortunngorluni tapersorsorneqarnissaminik imaluunniit tulluuttumik ineqarnissaminik pisariaqartitsippat, ikiorsiissut tutsuiginartuussaaq. Imaanngitsoq, malittarisassani allassimanera piinnarlugu. Imaanngitsoq, pappiaqqani allassimammat. Ikiorsiineq ulluinnarni malugineqartariaqarpoq. Ilumoorsinnaanngilaq, utoqqaat qanigisaasullu nukitik oqartussanut unammilligassanut atortariaqassagaat nukissaat sereertillutik. Ilumoorsinnaanngilaq, utoqqaalluni apeqqutaasassasoq, kommunimi sumi najugaqarneq, imaluunniit illoqarfimmi imaluunniit nunaqarfimmi najugaqarneq. Aamma ilumoorsinnaanngilaq naammagittaalliorsinnaatitaaneq akissutillu ersarissut aatsaat pineqarsinnaasut nukittugaanni.

¹ Utoqqaat pillugit oqaaseqartartoq 2025-mi UKIMOORTUMIK NALUNAARUT



DEMOKRAATIT

Demokraatit kissaatigaat inuiaqatigiit, utoqqartaminnut pitsaasumik atugaqartitsissatut. Imaanngitsoq angerlarsimaffimmi ikiorteqarsinnaaneq iluatsitsinerinnakkut pineqarsinnaasoq. Utoqqaat illui toqqissisimasumik najorneqartut. Puigortunngorsimasut qanigisaallu nalorninartumut inissinnagit. Aammalu oqartussaasut akisussaaffimmik tiguisartut, arlaannik ajortoqartillugu.

Oqartussat sumiginnaanerinu inuit eqqorneqartarput. Anaanaq. Ataataq. Iju imaluunniit ningiu. Aataq imaluunniit ittu. Inuk, inuusimasoq, inoqamminut tunniussisimasoq maannalu ataatsimuussutsimit pisariaqartitsilersimasoq, piumasani pisariaqarpaa.

Taamaattumik kissaatigaara, Inatsisartut aamma Naalakkersuisut pingaartumik apeqqutit uku isummerfigissagaat:

- Qanoq ililluta qulakkiissavarput, utoqqaat nuna tamakkerlugu paaqqutarineqarnerat, ikiorserneqarnerat isumassorneqarnerallu pisinnaatitaaffigisartik malillugu pisinnaagaat?
- Angerlarsimaffimmi ikiorteqarnermut, utoqqaat illuini, nakkutilliinerni aammalu puigortunngortunut suliniuteqarnerut nuna tamakkerlugu minnerpaaffiliinissaq ersarinnerusoq pisariaqarpa?
- Qanoq ililluta utoqqaat inatsisitigut illersorneqarnerat annertusarsinnaavarput, taammaasillutik utoqqaat qanigisaasullu kisermaasillutik oqartussanut paasiuminaatsunut akersuunnginniassammata?

Demokraatit isumaqarput, utoqqarnut politikki tunngaviatigut ataqqinninnermik aallaaveqartoq. Inuiaqatigiinni qanoq ittumik inoorusunnerluta apeqqutaavoq. Inuiaqatigiit, utoqqartaat oqalugiarnerni qutsavigineqartut, ulluinnarnili puigorneqartut. Imaluunniit inuiaqatigiit, ataqqinnissuseq aamma isumaqartoq iliuuseqarneq, akisussaassuseqarneq aammalu eqqortumik ikiorsiineq.

Kingulleq toqqassavarput. Qulakkiissavarput, utoqqaat pisarissersuutaasutut misiginnginnissaat. Qulakkiissavarput, qanigisaasut kisimiitinninnissaat. Aamma qulakkiissavarput, ataqqineqarneq illoqarfiup normuanik, sumi kommuneqarnermit imaluunniit ilaqutariit nukittussusaannik apeqqutaassanngimmat.

Qilanaaraara tusassallugu, partiit allat aamma Naalakkersuisut oqaluuserisamut pingaaruteqartumut qanoq isumaqarnersut, neriullungalu ataqqinnittumik kinguneqarluartussamillu isummorsorfigineqarumaartoq, qanoq ililluta utoqqaat atugaat ataatsimoorluta kivissinnaanerigut.